

四庫全書

集部

欽定四庫全書

明文衡卷八十八

明 程敏政 編

墓誌銘

北京行太僕寺卿兼苑馬寺卿楊公墓誌銘

胡 儼

公諱砥字大用姓楊氏世居澤州之南村曾大父誥大父禎父伯新皆居鄉里為善士公自幼秀穎與羣兒處

必習禮讓進退容止若成人長老見多異之年十歲入
州學為生徒即知務學既長學益懋遂充貢為太學生
洪武甲戌登進士第擢授大行人副嘗上疏言孔廟從
祀宜退揚雄進董仲舒有功名教踰三載陞湖廣布政
司左叅議舉賢能恤鰥寡去貪暴吏民懷服歲庚辰以
言事謫居遼陽及上龍飛特起授鴻臚寺卿時父已喪
乞終制歸廬墓側日夕哀慟人不忍聞永樂二年起復
為禮部左侍郎後以巡視河道坐失職降工部營繕主

事又調禮部主客主事八年春扈從北征典功賞有勞
勩十年二月受命詣北京簡閱馬騎還遂授行太僕寺
卿明年又兼苑馬寺卿而公於馬政竭心盡職往來畿
甸之間監牧攻駒馬大蕃息至於有司政令之得失民
情休戚之所關知無不言由是寵任益隆十五年十一
月丁母夫人司氏憂護喪歸塋特蒙恩賜鈔千錠道塗
給力役行次澤州之黃華里去家近一舍以悲哀匍匐
得疾寓于勝因寺明年正月己巳竟卒享年五十有四

計聞上悼惜之遣官諭祭三月庚申墓于州城之東南
村之原祔先塋也配焦氏子男二人長璞次瓚女一人
適李貴銘曰

惟楊氏出自晉始伯僑衍厥肩歷秦漢微復盛炳公卿
襲華慶迄于今世晉城胄雖遙系乃明公挺生揚休聲
著政績流德馨澤之東南村岡浮山鬱龍門蒼珏峯秀
丹水長宅茲幽公之藏百千祀永不忘

嘉議大夫北京行部左侍郎劉公墓誌銘

北京行部左侍郎劉公既卒其孤徵以予與公故乃寓書奉狀來求墓銘按狀公諱辰字伯靜姓劉氏其先沛人後徙鄞遷婺之金華則自公之曾祖三顧始也三顧仕元為明台上萬戶府經歷幼鞠于舅王氏遂因其姓故公之祖文璜父志皆姓王氏至公復姓劉公慷慨負氣節喜立功業以表見于世初王師親下婺州公首上謁署為典籤奉命使方谷珍谷珍令左右飾二姬以進公峻却之其人慚而退浙江左丞李文忠開省于嚴辟

公置幕下以資贊畫時元帥葛俊守廣信當祁寒集丁夫浚城濠民苦之欲為變文忠止之不聽遂怒欲臨以兵公請往諭以大義俊即悔悟謝文忠意乃釋既而授監辦金華茶鹽官秩滿課最以親老歸養教授鄉閭嘗道遇故人李惟中死於逆旅具棺歛瘞之任吳母喪不舉遺金塋之未幾二親繼歿執喪哀毀不勝衣所居室廬僅蔽風雨饘粥或不繼處之裕如也里人劉十八懷金入城遇二卒圖其金與飲醉之扶行水次欲加害公

見力解之獲免後以懷才抱德起為湖廣道監察御史
臨江同知陳斌受賕及銀工盜金皆坐死公為辯之得
減死論居二年以謬謬聞擢知鎮江府興廢舉墜勤於
其政聞宋宗忠簡公墓在丹徒荒穢墓田據於民即加
封樹復其田命墓傍寺僧收田之人以主其祀丹陽道
接句容細民任負載者往往因日暮行劫行旅患之公
嚴為禁盜遂息郡有潁江田八十餘頃歲久淪沒仍責
賦於民公請于朝除之京口閘廢舟楫不通東南漕運

者轉新河江陰二港以出江多為風濤阻溺公乃自京口至呂城百二十里去淤塞甃石作壩修閘門順水勢之出入於是公私便之然漕河源淺易涸每仰練湖以益水湖有三斗門亦廢公又修築之三斗門成漕運之舟既通湖下之田益稔時浙河轉輸之民道其境上死者為收瘞疾者給米命以小舟送出境賴以活者數百人永樂元年夏六月以預修國史知故實賜白金文綺襲衣陞江西布政司左叅政至則以久雨江水汎溢九

江諸郡瀕江之田皆勞饑民為盜富室多罹其害公即
檄郡邑勸富民出粟以貸饑者蠲其後以當其息官為
立券約明年償本粟由是富者樂從饑者得食南安贛
州等九府荒田糧六萬餘石有司歲抑取於民民不堪
公以聞悉蠲其額後以同官坐事相連免歸永樂六年
秋命下復起為北京行部左侍郎出特恩也公以老不
仕政日被顧問留京師者三年乃賜敕書文綺鈔錠致
仕歸踰年復驛召至京命督工武當未行疾作又賜鈔

錠遣官督醫給驛舟送還至常州毗陵驛遂卒實永樂
十年七月二十三日春秋七十有八孫祚奉柩歸塋文
星門下閣塘先塋之次是年冬十二月九日也娶陸氏
董氏董氏元中書叅政嘉訥女前四年卒陸氏有婦道
子男二人微觀觀蚤世女二人長適東陽施信厚東川
軍民府經歷次適徐叔紹皆陸氏出也孫三人祚祺禧
女一在室予與公舊同史館知公為人直諒多聞而公
亦以此自信有古節士風可尚已銘曰

不撓不汙而端其趨不激不隨而安以居恩榮始終而善不虛嗚呼來祀欲知其人視此刻礪

王希範墓誌銘

永樂十八年三月辛未禮部儀制司主事王希範卒予既弔哭還其孤錫持狀來乞銘將歸塋納墓中以詒諸後予與希範永樂初同被選擢入翰林又同日拜恩命為檢討時希範年甚少氣甚銳學通而才敏於人少許可獨以余齒少長頗推讓相與幾二十年始終如一日今

已矣銘不可辭按狀希範諱洪曾祖德甫祖善父輝世居錢唐希範生八歲即知務學及冠入郡庠從訓導胡粹中授春秋日記數千言無遺忘下筆為文辭沛然有奇氣凡所事所言若老成人粹中大器之年十八舉進士任行人將命關陝得使職人賢之未幾陞吏科給事中遂為檢討修大典為副總裁滿考陞修撰又陞侍講三以大比典文衡取士甚公職侍講踰二年遷今官適尚書呂公巡行關陝凡部事悉委希範敷奏論事詳明

同列敬服朝廷方屬意希範而希範竟遘末疾以卒享年四十有一其疾也得賜藥物其卒也又得賜棺且給舟載歸恩意隆至人莫及也初娶俞氏生子二人長即錫次欽繼室劉氏前浙江按察僉事必榮之女生女一人寧奴希範之學月開日益淳蓄深博其為文章務漸滌刮剝以期至於古人而遽止於斯悲夫將以年月日

墓表處銘曰

昏哲強弱才也窮達壽夭也脩身俟命人也君子脩

其在已侯命於天而已希範勤一世以脩諸已而卒不
施其命也夫其命也夫

前秦和州知州顧侯光遠墓誌銘 梁潛

秦和始為州其民之衆亂久而後定治之尤難而國朝
初相繼為之守者得二人焉曰吳侯去疾顧侯光遠也
二侯皆一時豪士顧氏先世居河南自宋高宗南渡始
徙而南居姑蘇之嘉定元末有知侯之材者辟為掾京
口及太祖高皇帝下江南京口首納款侯預有力其間

遂從高皇帝入金陵監大軍倉支納三年授江西行省
理問從征陳友諒督饋運明年平陳氏擢知龍陽州時
方甲辰年也招附懷來剷革宿弊民賴以息越二年改
知泰和州龍陽老穉至號泣於道不忍侯之去至泰和
前州守即吳侯也吳侯以民好訟告於侯侯憮然曰民
有冤抑守弗為之理民將安訴頃之訟者雨集侯乃自
為書榜聯紙長數丈誨諭諄切民爭來觀觀已去不訟
者十二侯又俾凡訟者居譙門上思三日然後得訴思

不三日去不訟者過半矣乃擇吏純謹者一人置簿受
訟詞而勾稽其始末民誠負冤也輒為疏理非誠負冤
願悔自止者聽不問未兩月民不復訟吏亦畏侯精敏
無敢舞文以病民境有虎適其時禁民私蓄兵民無所
措訴于侯侯為草檄告之神虎一夕遁去州以大治以
丁祖母憂赴闕陛辭命留翰林院同議編大明律律成
上進復命監造天下均工圖籍已而還服喪嘉定未幾
起復授廣東行省郎中二年召拜吳王府副相留京師

以他事註誤方逮繫間得疾飲水病結胃而卒臨卒為
詩壁間以慨道其平生有白髮歸朝之嘆聞者悲之子
存誠殯于都南門外三里店侯諱某生元某年某月某
日歿今洪武某年某月某日娶某氏子四人長即存誠
次存仁為河南偃師縣令以歿次存義存信存誠今居
嘉定存義存信從侯于廣遂留家焉侯性澹泊不尚侈
靡所居解宇室無長物惟藝蔬數畦食取充口衣取蔽
體而已至於治民事無巨細必盡其心在廣之日別廉

吏均轉輸浚城隍撫馴士馬安戢逋逃號令既明而賞
罰必信遠邇翕然及聞其歿爭欲為祠立石以頌其德
者屬有禁不可乃止侯嘗從元進士楊仲宏先生學賦
詩氣豪才贍而律調渾厚尤工七言晚自號蔗境翁詩
數卷題曰蔗境吟藁云於乎侯當草昧之初能卓然諗
知天命攀附聖主以自樹立可謂壯偉矣而用未臻其
極功業不究於當時獨其善政在民者民不忘也瓊州
守王君伯貞往來廣海間得侯二子訪之又素知侯之

惠愛不忍其泯也為序其事以屬潛為之銘潛與王君
皆秦和人也乃著其事之大槩吳侯安慶人為殿中侍
御史以致其後無聞焉銘曰

民厯草竊窮奸偷及茲弭寧誇相讎大吞小噬病曷瘳
正躬惠民邦兩侯後先敷政何優優隱絀舒伸暴帖柔
回通悔沮嗟相羞嗟哉我侯古罕儔衣被寵光壯謀猷
澤流盈溢爵未優身永逝矣名無休

襄城伯李公墓誌銘

王直

正統十二年十月廿五日襄城伯李公薨于位年五十
五上聞震悼為罷朝一日命禮部致祭工部為治墳塋
供塋事公侯卿大夫士皆奔走弔哭凡諸將士嘗隸麾
下者皆相與會哭盡哀蓋公喜讀書明道理文謨武略
靡不究知其事君也忠其待下也仁其制事也義其存
心也恕是以上下痛惜之如此公諱隆字惠平其先和
州人祖旺生有奇材太祖皇帝龍興之日常從征伐立
戰功累官至燕山左衛副千戶父濬又以軍功累至都

指揮同知從太宗皇帝靖難功多授奉天翊衛宣力武
臣特進榮祿大夫柱國襄城伯食祿一千石又以具爵
封三代祖考妣及配皆夫人公其長子也年十五襲爵
雖甚少而負英偉之資雄傑之材上深器重之永樂庚
寅以來每六師北伐輒命公領兵從其應機發策出奇
取勝雖老於行陣者亦多讓其能上益奇之以為可大
用丙申車駕留北京顧南京根本地擇可任留守者莫
如公遂命焉甲辰仁宗皇帝即位重北邊守備暫輟公

南京命總兵鎮山海凡東北邊關皆節制蓋隱若一長城敵為之震懾未幾復還公南京洪熙乙巳宣宗皇帝即位眷念公甚厚而倚賴益隆有白金文綺之賜公祇敬將事夙夜盡心蓋未嘗有間今上在東宮時知公忠勤宣德乙卯嗣大位又賜公白金文綺而眷注尤篤正統庚申上念禁衛重兵及諸司將士更番來京以備征調者雖有大臣總之而才智明決如公者不可不在其位乃命豐城侯代公還為之副公在南京十八年荷列

聖知遇以為股肱心膂褒嘉寵待之意具見所賜勅前
後幾二百道自古大臣得君之深而始終無間亦少有
如公者公行不違道而持之以誠小大之務必盡其公
威行惠施近悅遠懷是以其人雖有貴賤愚良寬鄙細
粗不同皆敬愛公如父母召還之日莫不願留而不可
皆曰公去矣吾何恃自都城至江上泣而送者相屬於
路公得人如此是豈以偽為哉公之在朝雖總理軍政
然謙已下賢務循大體不苟為異同嘗有詔舉將校之

可任者公必慎擇以進使必當其用有司黜民丁隸府軍皆公與兵部再閱不中者例有罰公曰彼出自田里非素習然方壯顧教練何如教練有法則怯可勇勇可使為精兵由是鮮有罰者丙寅命率師巡邊賜之鈔幣及寶刀一公曰軍事貴嚴寶刀之賜意其在此吾豈敢不力然公威令素著及臨邊申飭守備內外整肅訖還不戮一人上聞武近郊公等各嚴兵以待戎陣整肅號令明審坐作進退皆中度上喜各賜金織蟒龍紵絲二

有副公受賜惕然不自寧益思所以脩其職朝廷或有
政刑疑未決命文武大臣廷辯之公在其中侃侃正言
犁然當於人心士大夫益重之以為非獨將帥才也閒
居手不釋卷古聖賢之言行皆服行不忘祿賜之外不
妄取一錢嘗刻漢疏廣及唐盧坦之言以貽世訓諸子
曰吾襲父爵四十年幽遠之情固多未達所行之事寧
免過差然兢兢惕勵悔往脩來不敢欺公貪墨以負朝
廷付託之重爾等宜益勉諸公取費氏崇信伯獄之女

封夫人無子女一嫁武安侯鄭宏側室子五人珍璉珙
瑞瑾珍田氏出也女四人長未行次適興武衛指揮同
知張鑑府軍衛指揮僉事胡全珍兄弟卜以是年十二
月某日葬公於某之原太師英國公知公為最深為述
其行珍奉來謁予求為銘予亦荷公之知而慕公之德
且悲公之不可復見也奚可辭嘗觀晉之邵毅以詩書
禮樂將中軍晉是以大漢諸葛武侯不使有餘財以負
昭烈君子謂為大丈夫公庶乎是矣公自號湛然道人

人亦以是稱之於乎茲其所以為湛然者歟公庸行之
美見諸事者尚多不可以徧書姑序次其大者而系以
銘銘曰

天佑聖明賢俊挺生偉茲襄城邦家之禎維公額額厥
有世澤既世其功亦世其德珪璋之望熊虎之姿有武
有文施無不宜出則征行入則居守天子曰來汝予左
右公之在朝維一其忠不矯而異不翕而同正直之言
康厚之行衆人所思君子所敬天不慙遺隕星其堂壽

不百年人奚不傷高墳
我我公安于此刻銘垂
休焜耀無已

知府葉公墓誌銘

公葉氏諱砥字周道更字履道蓋楚名臣沈諸梁之後
以所食采為氏居南陽至晉有諱儉者為括蒼太守因
家焉其後又徙上虞高祖萬曾祖明祖某父良玉皆不
仕公天性明粹喜讀書早喪母童氏又喪其父皆能以
禮居喪不惑於流俗嘗受學於鄞陳文昭攜李鮑仲孚

二先生皆元故老博學有文章嘉公爲志爲之傾竭底裏由是學行大進洪武庚戌公以明經取進士第得定襄縣丞兵荒之餘民未安業公勤於撫字流亡來歸乙卯坐累謫涼州公處之泰然曰吾無愧於心足矣日杜門爲學有詩寄子曰不須詢遠道窮達信乾坤更號坦齋又號尋樂作賦以見志士大夫謫居邊者皆宗之守將西寧侯宋晟亦延致家塾爲子師己卯求賢陝西按察副使羅某臨江知府劉鵬上虞知縣李惟中皆薦其

學宜任史事遂起為翰林編修又有言其堪任風憲者
復陞廣西按察僉事用法平恕獄無冤滯吏畏而民愛
之嘗兼轄三道印出按郡至遷江會洞獠數出沒為寇
害吏民洶洶欲遁去且以無備諷公請少避公曰我去
汝縣官必遁民何恃以安即命料丁壯立保伍寇來併
力禦之彼豈不畏死耶頃之報益急公下令如故不為
動寇亦卒不敢至永樂初以史事被逮籍其家惟薄田
敝廬故書數篋而已事白還之仍命與史事書成改考

功郎中公進退人才品第高下小大各適其用尚書蹇公謂其年邁一以藻鑑任之他不溷以事會修永樂大典徵天下名儒命公為副總裁稽經考史無不愜當仁宗皇帝在東宮緝熙聖學擇儒臣侍講論公預焉其言於上者必堯舜周孔之道非是不以陳為郎中九年俾食四品祿職如故公重聽誤以為授他職上親灑翰授之至今寶焉久之公引年求去不許乃自言於吏部曰砥老矣過蒙優禮猶叨祿在朝人將謂何上若不棄願

得一小郡牧小民庶效報萬一吏部以聞即拜饒州知府公先教化後刑罰興利去害摧姦植柔民無愚良皆愛之如子水旱為災憂若已出每齋沐致禱必獲有年人以為德之應郡故有磁窰銅冶而丁調不減他郡公為力言於布政司得減四之一時方營造工之受役者當給糧贍其家布政司下饒州於遠輸內留八萬石給之公謂非戶部意不可衆譁然利其便請必從公終不許未幾部符下他已入倉者皆反之民使遠輸勞費彌

甚衆乃服公明決皆拜謝布政司亦自愧其所行凡再
述職京師皆以恤民隱革弊政去汙吏為急然謂饒之
風俗厚其民易化有訟者必以理論不付曹民知公之
愛已也多悔悟而罷有婦代前夫子訟蓋欲資其後夫
公揣知其故窮詰之以母子不忍為詞公曰爾不忍於
子何忍悖其父而從人邪婦慙裂狀逸去由是無理者
不敢至其庭訟簡刑清民歸德焉戶口增至萬三千士
之取科第者加數倍於昔公年益高而燭理益明遇事

亦若無足為者嘗賦詩以自適辛丑八月有疾作書戒子孫以睦宗族和戚姻重義輕利毋貽譏於後世尤以不能報國恩為慊是月廿一日卒於郡廨之正寢距其生元至正壬午三月初六日享年八十郡人無賢愚貴賤皆哭之哀諸孫奉柩還以壬寅正月初六日禮葬上虞廿一都駱家嶺薛氏墓山西麓配周氏賢而克家先公廿一年卒今合墓馬子男二信可用可有士行皆早世孫男五綸早卒綬應州學正緯以子貴封南京刑部

主事綺先卒續湖廣東湖馬驛驛丞曾孫男六壘充縣
學生未仕冕取進士今為松江知府嗣生蕃佐佑曾孫
女六皆嫁為士人妻公平生為文甚多號坦齋集今所
存者南行豪退朝豪芝山豪經進豪及經筵講義弟魯
道拙於治生無厚業婦家欲離婚公即以已產益之終
身不復言其自處儉薄雖位望之重比封君而蕭然不
異布衣時人有過失婉詞誨諭使知改而止未嘗疾言
遽色然內貞外和雖詞氣寬平而所守有不可奪者博

極羣書手不釋卷其所著述必根於義理之正而有益於世教蓋於漢魏唐宋諸大家無不學故其所立蔚然有盛名當世而可示法於後來於乎公有德行文學之美而又兼政事之長誠一代之鉅人君子矣墓三十五年而墓未有銘至是冕來京師以綬所為狀求予銘予從祖思忠與公同取洪武初科進士第及公來翰林予亦忝從公後蓋於公舊矣則今銘墓奚可辭銘曰

葉氏之先實楚名臣源遠流長子孫振振暨公承之乃

舉進士奮迹文章揚譽政事經幄詞林寵命自天堯舜
是陳維公則賢公既老矣皇用殊錫加乃常祿仍乃顯
秩公有誠言願守一州惠此羣黎庶幾寡尤湖山之間
厥壤千里人之愛公不異其子公逝不留民心則悲豈
弟之化百世之思我我新阡公安于此昭德有銘垂耀
無已

教諭聶大年墓誌銘

大年聶氏世為撫州臨川人曾祖某祖伯善皆不仕父

同文洪武中取進士為翰林侍書尋改中書舍人壬午
六月太宗皇帝至京師時盛夏以迎鑾暍死大年於父
卒後五月乃生母胡孺人撫育之天資明爽穎悟絕人
比長喜讀書日記數千言通詩書二經於諸子史無不
讀尤篤意古文及晉唐人詩書法歐陽趙松雪皆臻其
妙由是名動縉紳間用薦起為仁和訓導藩憲大臣與
一時達官顯人過杭者皆禮重之而大年之文章傳於
遠邇迎其母來杭旦夕率婦子備物以養必誠必孝母

之心歡焉逾六年母卒奉柩歸塋哀感行路鄉邑耆老
列言母賢行足以勵風俗而子又克孝如此詔旌表其
門閭服闋分教常州府學滿九載陞仁和教諭仁和之
人得大年復大喜敬愛逾往時大年乃言於有司修學
校嚴學規訓勵彌切諸生日加親慕教用有成登第者
彌衆賓興之歲諸藩省請典文衡者聘幣交走其門而
多以後至不能得為憾大年所至多得士人服其公凡
所經歷處遇佳山水及古人遺跡必見諸賦詠聯為大

卷藏於家景泰六年秋朝廷有史事徵詣翰林將用之而大年以疾告退就醫藥凡與善者數往來問候冀速愈而勢日危殆大年知不能起呼子章取紙筆書曰吾上負朝廷之恩下負平生之志爾兄弟尚勉學為士人擲筆而逝蓋景泰丙子二月二日也觀其所書如此則其抱負可知矣予初識大年於金谿王先生所又得其所作小瀛洲水竹居賦觀其詞翰而重其為人真可謂奇偉非常之士也常思振起之使效用當時以其學行

必有以名世傳後及被召來京師心竊為喜思與之久
處不厭而大年病予亦以老疾絕人事往還心雖相親
而跡則疎矣大年病甚遣門生李昂持簡來言身後事
蓋欲予銘其墓予聞而哀之不三日而大年卒矣於乎
予豈忍銘吾友哉大年生於洪武壬午十二月初三日
及其卒也享年五十又五配陳氏前平樂太守用晟之
女有賢行四子女四孫男四大年有詩文四十卷多可
傳者斯足以不朽矣章奉樞歸臨川將以某年某月某

曰墓某山之原予乃為述其行而系以銘銘曰
學足以為人師才足以適事宜出既逢時亦將有為何
天不憖遺而未究厥施嗚呼噫戲其誰不悲

明文衡卷八十八

欽定四庫全書

明文衡卷八十九

明 程敏政 編

墓誌銘

漫士高先生墓銘

林 誌

永樂二十有一年二月三十日翰林典籍漫士高先生
廷禮卒于南京之官舍年七十有四其子熟還櫬以塋
于長樂縣崇丘里之半占山使致韓府長史楊曜宗狀

來北京俾某為詞將以刺馬先生博學能文尤雄於詩
雖談笑奮筆而精思力摹莫及蓋詩始漢魏作者至唐
號為極盛宋失之理趣元滯於學識而不知由悟以入
自襄城楊士弘始編唐音正始遺響然知之者尚鮮閩
三山林膳部鴻獨倡鳴唐詩其徒黃玄周玄繼之以聞
先生與皆山王恭起長樂顏頤齊名至今閩中推詩人
五人而殘膏賸馥沾溉者多黃終于校官周顯行曹員
外郎先生與皆山並以詩遇今上初二人自布衣召入

翰林皆山即除典籍卒先生為待詔九年始陞典籍平生賦詠流傳海內有豪曰嘯臺集曰木天清氣集毋慮千餘篇其選唐詩品彙九十卷拾遺十卷議者服其精博能書工畫時稱三絕書得漢隸筆法畫原於米南宮父子出入商高間方壺子畫妙貞一初識先生稱賞不寘曰異時當為名家在翰苑二十年四方求詩畫者爭致金帛脩觴歲常優於祿入神瑩氣融襟懷高簡善飲酒喜談謔與人無賢愚新故盎然如一素彊無病晚得

風眩疾歲輒發無甚苦一日與故人飲極懼夜分乃寐
旦忽眩作弗能言卒考諱駒清才不羈蚤世謚皎白居
士妣陳氏宋樞密使洽之孫先生事母孝謹年五十七
方貴未幾而母沒娶陳氏先卒塋得佳兆虛右壽藏三
十四年乃合塋三子曰熊曰熟曰然五孫曰箕曰唐曰
默曰堅曰莆城先生諱棟字彥恢仕名廷禮漫士具號
也實宋尚書張鎮之後曾祖麟以出莅高氏祀復無子
取猶子隆為後遂從高姓是為先生之祖系曰

吳航山川蜿蜒扶輿是生偉人間氣之符嘯風噓雲山
含川嘯乾文坤象隨厥吐舒金石鏘鳴琚珩拱趨他人
夏夏已獨于于上追杜李高岑為徒畫船烟埃石經玄
圃精聚神交眈無今古三絕何資一官而旅春夢芸臺
晚心棋墅龍門其居樓曰翫宇落月綺裘清風玉塵鴻
儀冥冥翬羽楚楚其神天遊而蛻茲土

國子博士羅先生墓誌銘

周 叙

國子博士雪菴羅先生致事家居之十有三年年八十

二卒卒後十有四年其從子脩齡以義民謝恩至京師
乃持刑部郎中致事朱君邦紳之狀屬文誌諸幽且曰
曩少師東里楊公歸榮故鄉時先生嗣子世文嘗造謁
乞銘公諾之未暇也茲來公方在病前諾恐不敢遂願
以為請叙惟先生文學足以淑後進德行足以表當世
出處進退之節足以追配古人高年宿望邈焉寡儔宜
得如少師者執筆顧叙敢當斯寄辭焉而脩齡之屬益
堅憶永樂初元侍學家君大學時先生官學錄家君官

學正同官同舍相處幾五年家君恒前輩事之叙亦獲承教焉六館中求如先生者不二三人也蓋知之深莫叙若矣於是忘其鄙陋序次之曰先生諱恢字師程姓羅氏世為吉之永豐人以族望於鄉郡曰湖西宋末武岡教授開禮勤王死難丞相文公制服為文祭哭之事載史傳其六世祖也曾祖廷植祖建德父伯禹俱業儒世其家先生自幼穎敏五歲失恃既壯力學居父喪哀毀骨立裏事唯謹事凡如父敬愛篤至鄉里化之洪武

癸酉領撫之崇仁儒學司訓聘嚴師弟子禮勤於化導
凡經造就者悉得為聞人嘗上疏言孔子廟庭從祀當
以道學論當時有若優於宰予論語記有若言行者四
皆有裨於世教記宰予者亦四皆見責於聖人宜以有
若居十哲位次而宰予居兩廡公伯寮沮壞聖門不宜
從祀遽伯玉孔子之故人行年六十而化今居兩廡六
十位次之下未當宜例陞啓聖王廟疏奏不報其持論
正大多類此秩滿膺薦入史館與纂修太祖高皇帝實

錄竣事賜白金文綺陞國子學錄師範端嚴道德益高
前後相繼受業者千餘人永樂初太宗文皇帝幸太學
受襲衣之賜滿考遷博士又六載以年七十陳乞致事
時車駕巡幸北京仁廟在東宮監國朝臣致事者率未
得請為遣使上聞得旨俞允時論高之司業吳公嘗遊
先生門率六館寮屬諸生數千人祖送之觀者填道時
人莫不為先生榮既歸謝絕城府迹日與宗戚故人優
遊山水觴詠之適而詩書之訓考索之勤未嘗少廢間

與族弟某掇拾先世遺文暨族譜考訂修輯梓刻以傳
於家事澹然弗顧也先生德性忠厚儀矩端莊望者敬
畏孝於奉先遇忌辰時祀輒感愴泣下誠於接物於人
無疎戚長幼言行表裏如一一日忽召子孫語之曰吾
今日覺神不守舍吾其將逝乎時天初曙令啓戶視之
有頃而終平生遺藁有居田錄寫心藁歸田錄藏于家
其養氣之功蓋如此其生以元至正庚寅二月一日沒
今宣德辛亥十一月廿三日以沒之歲十二月某日塋

撫之樂安四十二都大塘坳祔先兆也母王氏繼母劉氏知溧水縣劉鈍菴之女俱有賢德配蘇氏內行克備先十年卒子一人世文孫男三人轅輓軌孫女一人曾孫男九人時曉眼曠昕昇暄昇昂玄孫一人璫銘曰

顯允羅氏代有聞人粵宋李世武岡益振興師勤王復其鄉縣烈烈忠精之死不變猗歟先生武岡裔孫再振厥華有德有言起教黌宮登薦館閣羣材彙興直筆輝焯亦有奏疏聖門示評言雖弗試大義孔明遷秩成均

十年乃調赫赫文名翼翼師表仕豈論達道高者稀年
至乞身超然其歸豈無歸者壽考能幾先生家居黃髮
兒齒優遊泉石八十二年令德考終清風穆然嗟予小
子敢當銘誌庶幾後來有考其世

故資政大夫靖江相府右相李公墓誌銘

陳璉

公諱質字文彬號樵雲姓李氏其先開封祥符人在宋
季有仕于德慶者因家焉公生穎悟有大志蚤知嗜學

經史子集無不讀讀輒記憶既長遭元季多故與時落
落不合遂家居不出日與弟文昭故情山水以詩酒自
娛居無何中原擾攘嶺海多事公起構義兵捍鄉里及
德慶路陷士民遑遑無所依戴推公入守之日夜浚城
隍繕甲兵扼險要以遏他寇由是一路賴之以寧時據
鄉邑者多刻剝殘忍公嘗戒麾下非遇敵毋妄殺或執
敵人來獻率給衣糧縱之家雖富饒急於賑施三族與
鄉里流寓之貧者咸有所仰以故一時名士如建安張

智茶陵劉三吾江右巴延子中羊城孫仲衍王彥舉皆
聞風來歸及大明皇帝定鼎金陵遣師南討洪武戊申
四月平章廖公永忠叅政朱公亮祖總師至公遂散麾
下全城歸附總兵遣使入奏上嘉公忠誠召至慰勞再
三賚予優渥就擢中書斷事越明年己酉轉都督府斷
事階奉訓大夫皆能執法丞相都督咸敬憚之五年壬
子授刑部侍郎階中順大夫尋陞本部尚書階嘉議大
夫尤慎於刑獄盡哀憐之情致淑問之頌寬猛適中為

上所知日益親幸時開行省於浙江上念厥地素重號
稱難治宜簡廷臣有德望才器者往綏之即拜公浙江
行省叅知政事階中奉大夫是年秋九月也下車首以
承流宣化為已任振紀綱正風俗勸農桑興學校舉遺
賢卹民隱知無不為為無不力居三年惠流兩浙厥績
以懋聲聞于上天子念公老名還致政于京師嘗入見
賜坐便殿訪以時政得失直言無隱上益重之八年乙
卯冬十月復起為靖相府右相階資政大夫有勅獎諭

甚至公益思竭誠以盡輔導之職嘗入覲因奏乞歸省
先隴上可其請王親揮翰賦詩以賜復命藩憲元僚與
府中官屬宴錢漓江之潯人莫不以為榮後王坐事去
國公隨終焉公美風儀性孝友治家有法接人以誠雖
極顯榮情素冲淡暮年尤工於詩有樵雲集若干卷生
於元延祐丙辰三月十一日卒於洪武庚申閏五月某
日初權厝金陵聚寶山後某年某月某日歸塋鄉之清
秀里布山之原祖廣孫累贈嘉議大夫禮部尚書父熙

春累贈中奉大夫浙江行中書省叅知政事祖妣孔氏
贈淑人妣林氏贈夫人公凡三娶先梁氏次石氏俱贈
夫人汪氏封夫人弟文昭學識優長隱德弗耀子四人
曰恒曰震曰復曰熙皆知學好禮惟震有詩名孫男四
人公瑾公瑜公璫公玖女三人梁仕貞梁明理嚴公敏
其壻也孫女二人次第公之行實來速銘者即震也於
戲自元綱解紐海宇兵爭乘時奮者莫不剝下自封樹
威肆毒少知推一毫為利人事公能仁其族屬以及於

衆視彼之暴豈直相萬哉及一時與公全城來歸者鮮
克有終惟公踐歷中外官至卿相忠義著朝廷聲名滿
天下勲垂竹帛德在人心五福備膺子孫蕃衍非先世
積善之深公存心之厚何以臻於是耶銘曰

嶷嶷李公世為粵人積善既久鬱而未伸族大而蕃實
自公始值元鼎沸保障鄉里公之庇民如室斯守公之
好賢誠出肺腑聖明御歷威讐四夷公散其徒全城來
歸帝嘉厥誠錫以祿秩尋陞秋官克殫忠赤後叅大政

于浙之中威德交孚聲聞上聰致仕于朝出于寵渥時
有數陳多所裨益逮居相國有謬其言直雖不容此志
則完之身云亡之德弗替慶流綿綿式延後裔清秀之
里布山之阡勒銘貞石垂美萬年

明故榮祿大夫少保戶部尚書兼武英殿大學士
謚文簡黃公墓誌銘
陳敬宗

榮祿大夫少保戶部尚書兼武英殿大學士黃公既致
政壽八十有三以正統十四年六月三日終于正寢其

仲子中書舍人采奉翰林修撰周公旋所述事狀致書於予而以墓銘相屬敬宗門生也安敢以不敏辭按狀公諱淮字宗豫別號介菴溫之永嘉人其先世諱衮者仕宋御史檢法歷世皆有文學之官至諱通者公之祖也通生性字思恭公之父也元季方國珍據于溫思恭懼玷偽官遂遁跡不出退號靜菴妣王氏公自幼即有經世之志年十二鄉學師命賦荷花十四充邑庠弟子員臬司官命賦挑燈杖詩語皆出奇驚人於凡經史性

理之學儕輩罕能及者遂中洪武丁丑進士二甲除中書舍人勤慎周密於職務無所不舉歲壬午太宗文皇帝入正大統首蒙召見訪以大政深稱意旨即命入翰林凡侍朝特命解公縉與公立于御榻之左以備顧問上以萬機叢脞日御奉天門左室每夕召公語至夜分上或就寢則賜坐榻前論議機密雖同列不得與聞已而命居內閣專掌制勅又選胡公廣揚公士奇楊公榮金公幼孜胡公儼與之同事是年秋陞公編修繼陞侍

讀永樂改元之明年甲申二月會試天下士上命解公與公為主考得曾榮等四百七十二人徹棘入覲上以得才之多為之甚喜上欲立東宮密預問公公曰立嫡以長萬世王法上意遂決三月冊立皇太子命公為左春坊左庶子兼侍讀賜袍笏寵眷日隆丁亥陞右春坊大學士仍兼侍讀進講東宮啓沃良多復勅兼輔導皇太孫戊子上巡狩命公及尚書兼詹事蹇義金忠諭德楊士奇留守諭之曰朕留汝四人居守猶唐太宗簡輔

弼監國必付房玄齡卿等其識朕意己丑春車駕啓行
明年庚寅車駕親征邊塞適長沙妖人李法良作亂皇
太子命豐城侯李彬率兵勦捕而漢王設疑沮之皇太
子以問公公曰豐城老將必能成功兵貴神速宜亟遣
以掩其不備既而法良就擒一如公言公以疾在告皇
太子命內臣問安復遣院判蔣用文視醫手書略曰卿
其勉進藥食早獲康安以慰予懷是年秋聖駕還京皇
太子遣公迎駕下滁州謁見上喜與語良久壬辰誥封

公父奉政大夫右春坊大學士母妻皆封宜人癸巳車
駕再巡狩公留守如故時漢王潛蓄奪嫡之志忌公獨
深日夜窺伺間隙流言監國之過公遂不免一滯十年
處困中惟日賦詩以自遣形於詩者無非引咎責躬之
言名曰省愆集又即人情變態之機寓之於言名曰自
省錄甲辰仁宗皇帝嗣位遷公通政使兼武英殿大學
士仍領內閣事辭不允丁太夫人憂乞守制不許特命
乘傳奔喪洪熙改元陞少保戶部尚書兼武英殿大學

士階榮祿大夫復辭不允命三俸兼支力辭尚書俸許之賜勅褒嘉上手增誥文二語曰勿謂崇高而難入勿謂有所從違而或怠蓋切於求助也曾祖祖贈皆如其官妣贈皆夫人父封如其官母封太夫人妻夫人是夏上不豫時皇太子往南京省謁孝陵遣使召還既而宮車晏駕羣情洶洶公及少傅二楊公佐鄭襄二王監國憂勞至於嘔血及皇太子還京即位大事始定宣德改元八月漢庶人反上率師親征以公多病留佐鄭襄二

王監國公夙夜在公至班師方歸私第疾益甚命太醫院使徐叔拱診視病少瘥即上疏乞骸骨不許固請始令歸田養疾賜楮錙萬貫陞辭加賜萬貫于時公之尊府靜菴先生壽八十有九公年餘六旬恪供子職彌謹弗懈先生沒上遣禮官賜祭命有司以一品禮葬既襄事公拜恩闕下上寵留累月賜遊西苑命公侯伯師傅尚書學士十一人陪馬仍召公之子采從行公乘肩輿登萬歲山賜宴山之麓翌日獻詩以謝上大悅比辭宴

餞于太液池親灑宸翰製詩送之給路費賜金織紗衣
一襲且諭之曰明年朕生日卿其復來明年如期入覲
上寵眷宴賜之禮有加於初九月辭還又明年上崩今
太上皇嗣位公入朝進香上嘉念舊臣寵賚優厚留月
餘辭歸公在永樂初知無不言言無不聽嘗有告黨逆
者公言於上曰洪武末年已有勅禁革不宜復舉從之
而大獄遂息靖難師後吏部例以南人官北土不効順
者奏編行伍公曰近有勅旨征討官與舊官事同一體

若復追罪南人與勅旨相背上即罷之斯時阿魯台既納款欲收北邊吐蕃諸部聽其約束請朝廷刻誓詞于金錠集諸部長唐酒飲之以盟公曰國家控馭遠方使各自為心則力易制若併為一則力大難制矣此舉實其奸謀也上顧左右曰黃淮如立高岡無遠不見爾等如立平地所見惟目前耳西域大寶法王初至京上欲刻玉印賜之以璞示公公曰朝廷賜諸蕃制勅所用不過勅命廣運二寶今此璞大於二寶邊人將謂法王尊

於朝廷也上甚嘉之至於命讞疑獄而疑獄無寃命議
鈔法而鈔法無弊具識見尤為人所不及嘗讀廷試卷
於上前同列有不直者公必正色直之不少隨順於是
人有目公為太認真者公亦不少變也及謝病歸田里
杜門却物不接世故者二十餘年所著文有介菴集歸
田藁藏于家配夫人楊氏淑德懿行儀于閨閫側室李
氏子男三長棐次采即中書舍人次槃女一在室孫男
五珣瑜瑄珪璨孫女五曾孫男一計聞賜謚文簡命禮

官祭者九有司賻塋如制以年月日窆于邑之德政鄉
大羅山之原從先兆也為之銘曰

惟周三公視古百揆公不獨立三孤以貳爰副變調益
弘化理維寅維亮公寔職此皇躬是保百辟攸式寵顧
雖隆小心翼翼視草玉堂高文大冊六經黃麻有典有
則獻替密勿日于帝側定策安邦宣慶布德廟堂柱石
薦紳著龜維鹽維梅鼎鼐是資列聖眷倚心膂股肱功
在社稷福及蒼生掛冠廿年乘化奄忽生榮死哀無間

存沒大羅之山鬱乎佳城勒銘閉幽百世其寧

故沐夫人方氏墓誌銘

夫人諱某字某姓方氏世家台之黃巖叔祖國珍仕元
金紫光祿大夫浙江等處行中書省左丞相太尉衛國
公父復初由忠靖校尉知黃巖州事歷陞榮祿大夫浙
江等處行中書省平章政事推恩贈其高祖宙曾祖震
亨皆越國公高祖妣潘氏曾祖妣周氏皆越國夫人祖
國馨蔡國公祖妣陳氏與榮祿之室鮑氏並蔡國夫人

鮑生夫人聰慧孝順甚為父母所鍾愛年十九為國朝
黔寧昭靖王側室夫人生長名族又獲承接大家心益
弘明事王與主壺耿夫人恪謹柔順終始不失上下禮
節處一家尊卑間謙恭溫和不順適生子昂有文武
才能為右軍都督府右都督翊贊其兄黔國公藩鎮雲
南積有勞勩故朝廷賢其子之才特賜誥命封為夫人
夫人愈益恭謹無纖毫自矜之色凡在閨閫莫不益重
夫人之賢享年八十有二正統四年正月二十五日以

壽終子男一即昂孫男五僖俊佐仲佑孫女三長適成
國公朱勇次適右府右都督陳政曾孫二璘猷曾孫女
一夫人既終昂在雲南昂之異母弟駙馬都尉昕夫人
期服子也率僖等奉裏大事惟謹卜以是年閏二月二
十三日祔塋于江寧縣長泰北鄉觀音山元王墓側銘
曰

婉婉淑姿穆穆令儀肩慶顯宗勲閔攸歸爰副主壺左
贊右翊敬嗣徽音克協懿德督府有子出靖南邦恩及

本源封誥煌煌副筭六珈寶鈿珠璧服茲命服寵光赫
奕既壽且貴五福具臻勒銘閔幽於昭千春

道會林君剛伯墓誌銘

吳訥

嗚呼自周衰道廢民散之後異端雜說紛焉競起迨漢
晉而降則唯老佛之徒為盛老氏本周柱下史未嘗毀
形滅姓世之儒生因或寄迹其中如唐魏文貞公玄成
鄴侯李公長源率能不遠而復建功當世後之君子所
以稱為振古人豪也歟其或抱負材器拘其法而弗能

出若吾鄉林君剛伯者可不為之深惜也哉剛伯林姓名復剛伯其字也上世居福之長樂高祖松洲宋末官遊常熟遂家焉曾祖諱近思祖諱脩德皆任元州學學職父諱大同號範軒國朝任開封府儒學訓導生三男子而剛伯居長甫成童五經四子皆成誦弗忘年十七出教陸氏龔氏家塾篝燈自課夜分始就枕時範軒患耳聾母氏亦衰病適邑中始建僧道官清溪道士尚守謙領道會職謂其徒曰吾教際時休明然匪資於儒則

何自而興哉遂延剛伯以儒書訓其徒孫張仁靜等剛伯樂其閒靜可以棲身養親乃請父母欲託身其教父母許焉清溪聞而喜曰吾教得是人必興吾當身任之遂錄為弟子改名復真給祠部牒為道士時剛伯年已二十有四矣永樂中舉至京脩勸善書永樂大典繼往龍虎山校正道書嗣四十三代張真人宇初暨其弟四十四代宇清推其學為教中第一號曰弘文輔教高士永樂九年選任道會復取赴北京修道藏經以老疾辭

歸宣德士子秋得肺氣疾瀕卒呼其弟長子宗授以所作詩文十卷囑付後事且命求舊交計嗣先生作行狀詣予乞銘既卒宗遣价奉狀來謁嗚呼予少與剛伯生同里曩範軒致政家居予恒持所業求正退即與剛伯講求古今述作之懿去年以書求較正乃翁範軒文集豈意今年遽聞其死乎嗚呼剛伯所學多有過人者使其弗汨于彼教其能亢厥宗以增輝此道也必矣惜乎此之失而為彼之得予寧不為之深惜也哉昔者昌黎

韓子序贈衡山廖道士稱其魁奇多藝因致惓惓憫惜之情廬陵歐陽少師亦嘗為故人明因太師記其始終言行于塔是則予於剛伯之墓寧忍弗銘也耶剛伯生元至正乙巳沒于宣德七年某月某日享年六十有八是年某月某日窆虞山陰銘曰

此其失乎而彼其得乎而吁嗟其可惜乎而

明故曉菴法師塔銘

楊溥

師諱善啓字東白號曉菴俗姓楊氏蘇之長洲人五世

祖慶宋發遣常州主管學事贈左朝奉即家吳之支硎
山值兵徙北郭父永年性好善稱揚佛子母陸氏師甫
能言通佛典父母異之命入無量壽院禮永茂院主為
浮圖既長屏迹龍山窮日夜力于經史百氏不輟聲譽
隱然日起少師姚公廣孝善世洽公南洲皆器重之而
典記於洽公者甚久永樂元年薦主蘇之永定寺六年
主松江延慶寺逾年擢本府僧綱司副都綱尋應召纂
修永樂大典預校大藏經賜金織袈裟衣一襲時三殿

災詔求直言師上疏陳利病不報內交沈少卿民望王
侍講希範王贊善汝玉陳檢討嗣初益深造詣而與璧
菴完公輩往還有江行倡和詩一卷與甫里趙公宗文酬
倡尤多歲遇牡丹開時必盛集題賞錢唐瞿公宗吉雄
於詞賦嘗用一韻往復幾百首而詞鋒益銳海內皆傳
焉正統八年十一月八日卒距洪武三年十一月十五
日世壽七十五僧臘六十以其示寂之歲十二月二十
三日弟子慶暉等與其姪旻昇奉柩歸塋于舊隱之龍

山遵治命也既葬且二十年而溥於塔銘尚未之作者
志蓋有待乎叨居侍從之列利澤不加于民空言無補
于世則亦負師期望久矣茲使交還獲訪墓于龍山下
見其塔銘尚虛以待之則溥亦何待而不言哉夫以交
之深者知必至也言之夥者情必厚也昔宣德間大理
卿胡公槃巡撫東吳威聲大振而於師獨加敬禮時溥
方冠欲應鄉舉謁公師忽見而喜之遂入白于公得預
鄉舉然溥亦始聆論議察其動止毅然一儒者由是往

還日就欸洽數日不見必折簡招之簡類歐語作字有帖意見必肅衣焚香啜茗坐語移時去則且談且送雖草草禮亦不廢或閉戶發篋出古人真蹟對閱評品如論宋仲溫陳文東二先生書宋筆正鋒陳或偏鋒故宋優于陳吳中稱高揚張徐為近代四傑然季迪衆作皆得體如律倣劉長卿選兼韋應物皆人所不到宜其為最文則喜柳宗元遇有作必朗誦數篇得其意趣然後下筆而詩則宗季迪也然皆不務蹈襲以為奇至論儒

釋之辯曰且各為其教又曰東魯垂道西竺見性皆莫先於厚本故雖離父母而養生送死率從厚與兄弟極友愛撫諸姪教養兼至而交四方宿儒名緇必以誠未嘗見懈體情容然非其人亦未嘗一與之交此韓子謂墨名而儒行王文正謂此失之而彼得焉宜為法門之僅有吾人之願交也而汎溥也荷師期待既久不亦知之至而情之厚哉倘以餘齒無負于斯世則亦無負於所知矣姑書此以與其徒慶暉等刻石于墓而且系以

銘曰

唐有師暢曰喜文辭宋有惠勤亦號能詩暢由韓子儒
行以彰勤藉蘇公得附歐陽顧今東白有學有德旁遷
詩文兼此二釋豈無韓蘇俾世有聞我何人也敢預斯
文龍山之陽齊閨之北寂焉淵焉于此埋玉奔走幾年
始遂弔謁有言莫酬庶永其碣

明文衡卷八十九

欽定四庫全書

明文衡卷九十

明 程敏政 編

墓誌銘

行人羅君墓誌銘

劉 儼

正統十四年秋敵入侵逼宣府城告急者日數至太上
皇帝時在御親率六軍往拒之分官扈從而行人司則
司正尹君昌行人羅君如墉濱行約同行於尹君所凡

四人尹於予居相比羅君過予曰適與妻子別諭曰從
駕出征危事也非使命時比萬一不幸我必死以報國
我死其抱吾二子徵狀元劉先生編修陳先生文以著
吾不朽予驚拒之曰何為出此言也君笑曰一得之愚
及敗績報至予往問其家道臨別之言如出一口予乃
痛哭曰如壻必死無歸矣其臨別之言可信也明日尹
君先自軍前遣歸其僕至於行裝中得詩凡十八首皆
與如壻及刑部員外某相倡和其詩大率傷奸臣擅權

軍無紀律惟以不虧臣節相勉期予讀之竟痛哭曰如
墉必死無歸矣觀是詩可知也其後同行四人三有詩
者果不還予以是知土木之役有弃義而逃者有雖知
義而迫於不得已者有如吾如墉素定於死其於所謂
從容就義者幾矣及是朝廷旌其義詔其子鑑入太學
以俟擢用鑑來徵銘於予此如墉之志也言猶在耳予
敢辭乎如墉字本崇別號竹峰世家廬陵之印岡高祖
中正元瀘州同知曾祖伯剛元鄉貢士祖彥偁父惟最

皆績學有聞公自少穎異初從安慶司訓母舅王來旬
讀禮記垂成乃歎曰詩吾世業也可自吾絕耶遂學究
兩經鄉大家交聘為子弟師太守四明陳公聞而召之
見試以長江萬里圖賦君援筆立成累千言皆新奇有
深意公奇之以為邑庠生予時於陳公所見是賦已心
識而敬服矣正統七年君由鄉貢與予同以文辭登進
士第除行人司行人由是日親且厚間從出使歸必過
予道其道途所過古聖賢祠墓遺跡處或祭以文或歌

以詩疊疊不厭且論所至藩臬郡縣官賢否歷歷如指
諸掌後驗其人成敗果然蓋君若溫然和易而其中剛
介明白人不得而欺故所至人皆敬而畏之平生孝於
親友於兄弟於朋友急其難雖禍患有所不避其文章
辯博暢達喜往復然皆有法度而宿於理其材贍故求
無不應者卒之日年四十有六兩娶皆郭氏子男三人
長即鑑次某俱繼室出某遺腹生也諸孤以某年月日
立木主塋公于某山之原於乎民生於三事之如一惟

其所在則致死焉君能致其死無愧為人臣矣銘曰
忠魂義氣與造物遊隨寓而安奚必首丘亦有歸時茲
為幽宅人感其義過焉必式

奉天翊衛推誠宣力守正文臣特進光祿大夫柱
國靖遠伯追封靖遠侯謚忠毅王公墓誌銘

彭時

公諱驥字尚德姓王氏其先本太原人自秦漢以來為
將相者踵接蟬聯族遠而分世次莫可考後有宦遊雲

中者因家宣寧即公所自出也曾祖守道克世儒業祖
思宗仕元保定高陽尹父成以宦家子留居于東鹿呂
村里入國朝遂占籍焉成以讀書力農為務里鉅族程
子晉見而賢之妻以愛女是為公之母夫人也公生而
岐嶷警敏年十三遊邑庠刻志問學日記數千言識者
咸以遠大期之永樂丙戌登進士第拜兵科給事中剛
正敢言嘗奉命出鎮山西奏蠲徐溝鹽池虧課二十餘
萬民困以蘇尋陞山西按察副使理冤獄戢姦盜風紀

振肅入為順天府尹弛張得宜畿內稱治宣德丁未陞
行在兵部右侍郎越九載遷尚書練達兵政得大臣體
正統丁巳阿勒台多爾濟巴勒數侵邊甘涼數州驚擾
尤甚朝廷患之命公西巡許以便宜行事公至稽閱邊
備知守將弛弛而令不嚴歎曰如此而欲敵無侵凌難
矣翊日集衆轅門詢平日畏敵而不畏將者得都指揮
安敬即斬以徇曰自今畏縮者視此一軍震慄失色因
簡閱戍兵以甘州戍兵冗濫乃定為去留使相更代於

是兵得休息民減轉輸之勞敵嘗入莊浪公遣兵授以
方略使擊敗之敵乃引去及公還敵復窺邊公馳赴甘
肅遣副將蔣貴率精騎出擊戒曰勉之去而不能成功
無相見也貴感奮追敗敵衆於石城兒泉公計強勢猖
獗不一大摧刈無以示威既諜知敵部落所在復以貴
為先鋒襲之自率驍騎與都督任禮等分道而出刻期
夾攻轉戰二千餘里俘男女二千餘口敵帥走死西陲
以寧捷聞上遣中貴勞以金幣命兼大理寺卿支二俸

明年還京辛酉雲南麓川宣慰思任發叛亂擾邊命公
總督諸軍征之陞辭賜金兕鑿細鎗弓矢蟒龍緋袍以
寵其行公至雲南方盛夏衆謂進兵非宜公曰賊毒吾
民行可緩乎敢言不進者斬遂部分諸軍以進至金齒
分為三道徑抵上江上江者賊砦所在也夾攻三日不
下會天大風公命縱火焚柵因督衆乘勢力戰斬首五
萬餘級賊敗走保險為拒公益麾兵深入破連環七砦
于沙木籠山又破象陣于馬鞍山之陰死者十萬餘賊

首潛遁乃振旅而還先是維摩州賊韋郎羅僭稱廣新王命公還師勦之至是公還雲南計曰此不足血吾刃當以謀破之乃遣偏師抵其境聲言王尚書大軍至矣賊黨聞而潰韋賊計窮遁安南傳檄追之安南懼斬其首并妻子來獻廣南與富州接境二土官交惡十餘年公諭以禍福兩讎乃釋凱還上遣官迎勞數百里外廷見宴賜甚厚特封靖遠伯食祿一千二百石號推誠宣力武臣階特進榮祿大夫勲柱國賜誥券追封三代如

其爵未幾聞麓賊思任發羈于緬甸復以督軍往取之
既至緬人懷詐黨惡而不遣公縱兵攻緬破而麓賊
遁去俘其妻子象馬而還加祿三百石是年秋西巡寧
夏甘涼中飭邊備訓練士卒其於守戰攻擊俱有方法
敵聞風畏避不敢近塞戊辰春賊黨思機發復據孟養
跳梁公復督兵往征兵抵金沙江賊柵西岸以拒公作
浮梁渡兵一鼓破之賊退立三柵自保公督戰益急不
日而三柵拔賊黨殲焉西南自是悉平有苗虫富者偽

稱剡平王別將屢征失利命公掛平蠻將軍印總兵致
討卒檻送虫富京師餘黨悉降公還詔增祿百石令世
其爵景泰初以南京根本重地委公守備公嚴立禁條
宿弊一清不便者撼以流言乃解機務就閒天順元年
春上復臨朝召公便殿慰諭以勲舊命兼兵部尚書不
數月軍政脩明賜金織蟒龍衣二襲尋以年邁請解部
事從之特免常朝賜誥加奉天翊衛推誠宣力守正文
臣特進光祿大夫勲爵世襲如舊而寵遇益加隆焉天

順四年五月十一日終于正寢享年八十有三訃聞上
嗟悼輟視朝一日追封靖遠侯謚忠毅公初娶張氏子
二人曰玉曰瑤俱早卒繼娶劉氏子二人長曰瑞應襲
次曰珩勲衛義子曰祥以征南功授錦衣衛指揮僉事
孫男三人女四人諸子扶匱歸東鹿以是年八月初八
日塋于邑之平原祖塋禮也公天資沉毅識量宏偉有
文武長才遇事剛果剴繁治劇不以為難行師征討用
法嚴明而料敵制勝雖老於軍旅者有不及故所至輒

能成功及其晚節保身全名守以謙虛而忠愛之心始終如一誠一代之偉人也然所稟尤異年雖高邁精力踰於少壯疾且亟神尤不亂遺言托冢宰王公狀行而以墓銘屬時時謏材穉筆曷足使公不朽公既有命庸可固辭銘曰

天佑皇明輔以忠良脩文立武咸展厥長於惟王公挺生冀土河嶽孕靈才兼文武早遊藝苑被服書詩乃登黃甲給事瑣闥流譽蜚英踐敬中外爰陟司馬式儀有

位雍容殿陛正笏垂紳手提樞軸潛幹化鈞視師三邊
程勇戒怯兵將力齊敵聞震疊其有狼噬輒獮以兵馘
強俘弱西北用寧蠢爾蠻方敢為民毒帝命師征惟公
總督建牙秉鉞令一而嚴兵威遠震如火斯炎挫銳推
堅勢同拉朽止弗窮追懷以仁厚彼昏不知伺間竊發
公而再往根株悉拔和風甘雨妖暄廓清西南萬里同
我太平惟帝念功官賞是懋列爵疏封寵延先後入文
出武邈乎無倫名昭宇宙允為元臣天不憖遺而遽不

起山頽梁傾朝野哀止爰稽德烈著于幽堂於千百世
赫其有光

興化知府致仕岳君墓誌銘

葉盛

英宗皇帝既復辟宥密之臣累出親擢其第六人則吾
友燕山岳君正也君固奇士而王吏部忠肅公又嘗亟
稱其賢上雅重之君亦自幸魚水之遭凡所陳請所撰
述所對答竭盡忠藎多稱旨一日湯序言變異以占法
進云姦臣未盡之故上以問君君叩首曰姦臣未聞求

之將人人自危況序術疎淺宜不足信上悅時石曹二
猾勢方張君虞其將來必不靖因極言於上前且退而
面開導之使為保全計二猾雖陽喏好辭中實銜之蓋
未幾君之禍作矣上猶惜君甚止出為欽州同知既又
追及逮繫責戍甘肅之鎮夷二猾尋踵敗上惻然有思
曰岳正言是也召還將復有所用而龍馭上升矣成化
初君居母憂服闋御史有言當亟召用君以勸忠詔仍
元職吏部言當調南京有旨其勿調命充經筵講官纂

修先朝實錄適兵部清黃官闕部院大臣會薦君遂以
成化元年四月俾知興化府以行君在官生財惠民
始譁而終服號賢守有司者或不知禮君君迺有歸志
歲已丑來朝請致仕家居越三載為成化八年九月十
一日疾卒得年五十五公卿以下皆往弔哭莫不嗟悼
曰岳先生亡矣君字季方別號蒙泉畿內鄯縣人曾祖
德甫祖思明父興懷遠將軍輕車都尉府軍前衛指揮
同知母太淑人劉氏君少年已能學有名二十一領鄉

薦卒業大學正統戊辰會試同考誤寘落卷中侍講杜
寧獨驚其文言於高文義公以為此吾輩中人遂占首
選廷試第三名授翰林編脩景泰三年陞右春坊贊善
兼編脩天順初元改修撰是年六月被命入內閣叅預
機務及其得罪去僅一月耳君偉貌美髯言論灑灑動
循矩度居家孝弟交朋友有始終之誼平生性剛而志
高抱負經濟不輕屈下人有古豪傑之風石曹事或迂
議之且以未信為言直應之曰何得以諫官處我我道

當如是其篤於自信如此人有不可意事雖權貴人當
言即言之無宿藏而人不之察以故愛君者雖多卒不
能勝夫嫉君者之屢也配宋氏孺人側室周氏王氏子
男二增堂皆夭女六長許嫁而卒已嫁者壻朱昱生員
李經翰林編修李東陽餘未行君之學精博旁熟莊騷
至方外度數諸書無所不窺所著經解務出新意多儒
先所未發惟深衣纂誤成書文章有類博藁若干卷書
法晉唐可名家於乎才美如君即特置華要先皇帝之

明也中間蹇連坎坷有若不堪處者然觀君今日之金
緋在躬考終牖下自非先皇帝今上皇帝之明且仁則
雖欲得此難矣若是者在君其亦可以無憾哉以卒之
年十月七日塋祖塋之側君之兄端府軍千戶祥宸君
無子率其猶子培均坪坦墉長號嚮予乞銘予為作銘
慰答之亦以慰君於地下焉爾銘曰

古有李白其人亡嗣亦有柳州擯斥以死其名之長弗
繫乎此

大明故資德大夫正治上卿南京致仕兵部尚書
兼大理寺卿贈太子少保謚襄毅程公墓誌銘

劉珥

成化己亥秋九月二十有七日南京致仕兵部尚書兼
大理寺卿休寧程公卒于正寢有司以訃聞詔贈太子
少保謚襄毅遣官諭祭營塋朝紳咸曰公一代人豪而
今已矣可惜雖然朝廷于其生加以亨秩于其休褒以
璽書于其沒優以卹典且有象賢之子昌大其業是公

雖死猶不死可謂無遺憾矣既而其子敏政慟謂予曰
先生交先君子三十餘年僕又曾聆先生一日之教茲
墓中誌銘敢以為託乃誌曰公諱信字彥實世居徽之
休寧其先聞臣大儒載在簡冊可考高祖諱社元至正
末用薦者起為承奉班都知不赴曾祖諱吉輔兩世妣
皆吳氏祖諱杜壽國朝洪武中謫居河間考諱晟俱以
公貴贈兵部尚書兼大理卿祖妣江氏妣張氏俱贈夫
人公以易經中正統辛酉順天府鄉試明年第進士授

吏科給事中已巳英廟北征公偕廷臣上疏諫止不報
已而師潰土木敵遂南侵京師戒嚴命公守西城上言
五事曰新號令以振軍威募勇敢以備警急召勤王以
遏南侵設武備以防內變養銳氣以備戰守皆見采納
敵將也先自西山一帶進薄都城都督孫鏜禦之失利
乞領衆入城公堅持不可躬督諸軍自城上以火鎗礮
石鼓譟為鏜援敵引去景泰紀元命公充副使持節冊
封華陽王妃凡王府有餽遺悉却之歸陞左給事中辛

未九月英廟還自迤北居南宮公復上中興固本十事
曰敬天求賢納諫謹災節用詳刑選將練兵尚儉隆師
而敬天一事則當時天象屢變請景泰帝隆孝友之實
以答天心之仁愛聞者壯之壬申陞山東右叅政總理
遼東邊餉巡撫都御史奏倉官吏卒盜糧石以上者死
乃造新斛視舊加二寸付公公立碑而火之曰使彼真
盜死不足卹今故加此斛置人於死地豈情也哉遼卒
至今能道其事會以憂去轉四川分巡所至問民疾苦

松潘賊人作亂公偕侍郎羅綺進攻破其黑虎諸寨天
順丁丑英廟復辟公奉表入賀時方錄景泰間上言之
人遂留公為太僕卿遼東巡撫缺員陞公都察院左僉
都御史賜勅以行守將海寧伯董興姻聯曹欽公一切
裁之以正又造戰車創義倉行贖罪法設月輪簿凡百
號令一新建州部落董山潛結朝鮮公使土官佟成授
以成算往廉之得朝鮮殺董山中樞院使制書以還公
疏曰乘其未發急遣二使問之可伐其謀朝廷乃命一

給事往朝鮮一錦衣譯者往建州二人初不肯承出制書示之咸相顧愕然各貢馬謝罪邊人寺來聚衆欲入寇公自率師巡邊營于境外者凡三月得風濕之疾自此始都指揮夏霖事多不法與董興相結納僉事胡鼎按其罪四十公以狀聞詔中官及錦衣郭指揮逮霖而籍之不意中途受賂乃奏虛實相半都御史寇深因併劾公輕聽胡僉事言調南京太僕少卿刑部缺堂上官廷臣言非公不可召陞右侍郎尋以憂還河間今上皇

帝即位起復公于兵部又轉左侍郎成化丁亥四川貴州山都掌蠻據大壩山箐之險叛服不常陞公尚書提督軍務與襄城伯李瑾統番漢兵討之公至永寧自督大軍入金鵝池又分四路兵期會于大壩將士依公方略用神銃勁弩攻賊賊不能支連破二千餘寨獲銅鼓數十斬首五千級生擒二千餘賊復走入深洞公命軍士以土石窒其門以兵圍之月餘賊死洞中臭聞十餘里又陰察九姓土獠之附于賊者還師撲之未及載都

掌悉平又布置衙門邊事以定凱旋進兼大理卿有白金綵幣襲衣之賜前此公營大壩凡兩月淫雨不時瘴癘荐興舊恙復作至是四上疏請老俱不允辛卯春上以雨雪不降求言公上言兵事可更張者四兵弊可申理者五詔下所司執政者難之未幾三邊有事悉如公所料南京缺叅贊機務大臣廷臣交章薦公為宜上允所請公至南京適彗出軒轅乃與六卿合議復上言興利除害三十餘事多見諸行他若汰貪縱循舊典可書

者尚多在南京叅贊已四載復疏乞休上重違公志賜
勅還鄉有疾若去體其勿久安于家之語明年公還休
寧里第又四年謝世距其生則永樂丁酉閏五月十六
日得壽六十有三塋邑東南南山之原配林氏累封夫
人子男三長即敏政成化丙戌進士及第授翰林編脩
累陞左春坊諭德學行為時所嘉次敏德太學生次敏
行邑庠生早卒女一許聘忠義前衛指揮子凌雲漢孫
男三壩圻塏女三俱幼嗚呼公儀觀魁偉性資剛果六

籍百子無不涉獵為詩文略不經意而雄渾可傳事親孝少時嘗力耕以養居憂廬墓側有芝產之瑞教子弟嚴而有方待內外親族恩義兼盡遇故人子矜恤振拔惟恐不及凡百玩物一不以挂目為諫官知無不言言必達大體而嫉惡太甚佐兩藩及法司必以敬正輔長官不隱忍坐視以為賢掌兩京兵政及征伐俱有成績又能任怨南京守臣或欲預錢穀詞訟公曰守備機務所以謹非常若此乃有司之事也斷不可預論者以為

得體征川貴時詔以便宜之權付公公自發兵至凱旋
不爵一人不殺一人同事者以為言公曰刑賞人主之
大柄懼閭外事不集而假之人若幸而事集又竊弄之
豈人臣之道也論者又曰此古名臣之心名臣之言可
以為後世法若今敏政輩進退未已能昌大其業安知
天之報公不在此邪晚號晴洲釣者有晴洲集若干藏
于家銘曰

於惟襄毅晉臣之系宋儒之裔豪傑其才剛大其氣於

昭襄毅科第高登祿位馴致兵刑聿司留後是寄果哉
襄毅衆方焚焚我獨易易不數言間能決大議偉哉襄
毅車轍所至吾民獲利威震蠻貊名揚當世無憂襄毅
文事武備有人承繼誕昌前列引而弗替無憾襄毅善
始令終聖恩特異歸于南山垂休千祀

明文衡卷九十